



BEIGUAL NUNGTHIL KITNA

Awle! Pathian hepina zal in kum 2019 tawp lam i tung to kit tau a, kum sin ah kochuamte'n Beigual tha i la mat sek uh le kum dang sang ah danglamna tak tawh i mat diu kinep a um hi. Zia chan ah ei puitu Lal Pathian chu lopina i pia'u ahi.

Beigual tha sung ah khan kochuamte'n taksa leh thagau lam ah hatlote kanthakna leh ln vekhâklote vethâkna hun ah i mat uh gingchak a um hi. Ahinla, ngaitua kham ting ma ma chu; kum sin in Beigual hun in theitawp i sua sek un, thupi hawi tak takte le i chiapi sek un, himaleh gasualo ah mangliam mai mai sek i hi diam uh ti hi gelkham ting khat ahi. Ahiloleh, kochuamte hin titakna neizolo ah Beigual hun hi mang mai mai i hitau em le? Khristian min pu ah sakhawmi bep i hitau em? tite haw hi ngaitua thak a pawimaw hi.

Khristian hinkhua hin a pawimaw ma ma leh i hiding him uh chu ga pha sua hi ahi. Zia dinga chun Khrista thisan ah tatdaw i hui ahi. Himaleh gingtu hinkhua i chiapiu danteu hi thil in gasua zolo deu i bang tau ahi. Khristian minpu zing ngal ah eimau nawp dan chiat in i khawsazo tau ahi. Gingtute'n ngaituana thak ipiak uh hi a kul ahi.

Kochuamtin in Beigual tha imat danteu kha chuam chiat ding in gingchak a um hi. Khenkhatte'n ln tin vethakna hun ah mang hitiu in, khenkhatte chun Biakin lam

ngawn ah mang le um ding ihui. A bang chu hitaleh, khawi zawk chule a sia um puan a. Ahinla, tuchung Beigual tha hi kochuam puitu khenkhat a ding in House Visit a bawl patnau bang um ding in gingchak a um hi. Kochuamte'n a bial awptu teu a melhiatnau hipan tiding bang um ding ahi. A bik tak mai in kochuam puituten i belamteu hiatmil leh nutsia i neillo teina ding ua pilvang tak mai ah malakna i nei ding uh ahi. Biak in ah ei mau limtak mai ah i um lai un panpi ngai ma ma kochuamte khat ala umkha thei ahi. Damlo kanthak ngai

ahiu em, ginna lam ah hatzolo ah chau leh ngui ah um ahi em ti haw ngaiven a kul hi. Hak-sa leh basamte haw thawkna chu i thawkpinaw latsak jing ding ahi. Mun khat lam ah lim leh lâm ah i um zing lai un, kua hem khat basam ma ma ngal ah i limsak khâklo um khan a. Ziakachun, kochuamte haw a ginnaw leh thagaw lam uh suk-detna dinga pan i lak danteu leh i kipuihuai danteu haw hi etthak a pawimaw hi. Zia ding ah chu Lalpan mitam tak laka a nasem dinga kochuamte hi ei guat chuam ihu ahi.

Tulai kochuam gam ahin Pathian thu hiatna lam inle i nakhangteu haw a sang zota, zukham kham ziangten le Pathian thu hi a he ma ma mai tau a. Ahinla, Pathian thu hiatna mai ahin chu kumtuang hinna a um pua, Pathian thu chu hiat thaw mai ding hilo in eima ah a um zawk ding ahi. Ziaziakachun, kochuamte haw Pathian thu i kiziltinaw ahin le pilvang a pawimaw hi.

Bible chun: “Nangma leh la thuhil ah pilvang tak in um in; zia thilte chu bawl zawm zing in, zia gual ah la

bawl chun nangma leh la thu ngaithate chu hukdam in um in au.”(ITim.4:16). atia. Khrista chanchinpha hi a ngaithate leh eima a gentu a ding ngei a le hukdamna ahiding ahi. Kochuam gam ah i kalsuan danteu haw hi thîl in chualchum ma ma i bang tau. Kochuamte’n chanchinpha thu nasataka i tangkopi jinglai un a gentu kochuamte hin khawlo kuai ma malo i hi diam uh? Pathian thugente chungchang ah khawlai tawt thu khat chun, “midang a ding a ka gen ahi.” ti thu hi tulai hin i zui chiat uh a bang zotai. A gentute a dinga le hukdamna chuam umtalo, a ngaithatute a dinga le phatchuamna um diaklo ahi zotai. I thugenteu hi haw a ngaithatute kipakna ding lam bep leh a limpi ding bep uh ibuaipi zaw tau ahi. A ngaithatute’n a hatpi ngei ding zawk uh gending ahi.

Beigual hun i matdanteu kha nungthil hitiu in ikalsuan danteu haw kha ngaitua in kienthak hitiu. Lalpan ei ngansi-ana haw semlo khat in um kha hitiu. Eima chau dik kisa i umzing lai un Lalpa Pathian i chung un lungdamlo in um khana.

NICEA THUGIN (CREED) LEH BIBLE GEN DANTE SUINA

~Rev. Dr. Hangpi Manlun
Moderator Zou Synod

1). Thumapui.

Awle, kochuam chungchang thu hi ahelo le i umta puau, tileu hin genkhial puai tiu. Ahin, kochuam hina diktak hephalo leh hechianlo i um thei a, i hiatchian semna ding in gunchu tak in zilkhawm hitiu.

2). A paukam umzia:

'Kochuam' ti kampau hi Greek pau 'ekkklesia' apat lakdaw ahi. Zia chu mipi chiakhawmte ahilo leh kikhawm khawmte genna in a kimang hi. Chuleh, 'Septuagint' (LXX) a tiu, Greek pau a ledaw'u Hebrai Bible chun 'Qahal' a ati. Chun, 'Qahal' chu Israel mipi chiakhawmte genna in a kimang hi (I Leng 12:3; Deut. 9:10; II Chro. 20:5; Neh. 5:13; Mik. 2:5; Num. 16:3). Zia 'Qahal' hi Israel nam genna ding a mat ahi zia in, Thuthung Thak ah 'Pathian mite' genna pau mat ding in a mangtau hi. Ziabanah, 'Qahal' ledawna 'Greek' pau ah 'ekkklesia' umzia chu 'kodaw' tina ahip-

en mai hi. Khawvel mite lak a pat, Khrista a dinga kodawte chu 'kochuamte' a titau. Paul in le Thuthung Lui a Pathian mite hezing in kochuamte chungchang a genna chun 'Pathian Israelte' ti'n gingtute chu a ko hi.

3). Kochuam chu kua phu a hem?

Zia thu hi Pathian thu thiam St. Augustine ngaidan in Jesu'n Peter kiang ah "Nang chu Peter la hia, kei chu suangpi ka hi" (Mt. 6:18)- atia. Zia suangpi ah chun ka kochuam lemto ing katin, satan lopitak chu hung peding ka hi' ti'n a hilchian ahi. Zia Augustine ngaidan leh gendan hi Protestante-te ngaidan le ahi tangpi hi. Thuthung Lui ah Pathian kha Suangpi gual ah hat ahi zing hi (Deut. 32:4; I Sam. 2:2; II Sam. 22:2, 32; Sam 18:2-31).

Paul inle Jesu kha lampi ni-in, Suangpi gual in agen hi. Kochuam hi Insa gual in a gen a, a kil ah suang pawimaw pen chu Jesu ahi ati ahi (Eph. 2:20). Israelte thalek gamthip

ah avakvai lai un, tui a dawna suangpiu kha Jesu etsakna ahi ati ahi.

Ziakachun, Lalpa Jesu kha kochuam luchang leh kochuamte chu a taksa ahin, “Lalpa khat”, “kochuam khat” ahi. Adang a um puai (Kol 1:18; Ephe. 4:15), atiu ahi.

4). Sawlchak Paul in kochuam hina a genchetdan:

Paul lekhathawt zosia ahin kochuam kitina thumal hi 60 vei Bible in achuang a. Thuthung Thak bu zikte lak ah Paul hi kochuam umzia genchiantu pen khat ahi. Gingtute'n kochuam diktak a hiatchianna ding un lei chung ah thil umte tawh lampi li (4)- in, a tekhn hi. Ziate chu:

4.i). Kochuam chu Biakin thi-angtho ahi. (IKor. 31:16-17; 6:19; Eph. 2:20f; 4:30).

4.ii). Kochuam chu Khrista Mo thiangtho ahi (II Kor. 11:2; Eph. 5:25-27).

4.iii). Kochuam chu Khrista taksa ahi (Rom 12:49; IKor. 12:12-17; Eph. 1:23; 5:29,30; Kol. 1:18, 24, 28; 2:19), tite leh

4.iv). Kochuam chu Pathian tel Israel thak ahi (Gal. 6:16)-tite ahi.

Chuleh, tuhin kochuam

hina diktak leh Zia chuamch-uamte, ‘Nicaea Thugin’ (Nicaea Creed) in a puandaw chi li-(4)-te leh Bible in kochuam hilchet-na dinga thumal chuam chuam amat tangpite gen ding i hui.

5). Amasa'n, ‘Nicaea Thugin’ in kochuam hina a gente sui masa ding ihui:

5.i). Kochuam chu Khat (One) ahi.

Kochuam chu khat ti hi kochuam hina zia pawimaw tak a taklatna ahi. Kochuam chu leichung ah pawl chuam chuam in a um a, thugin leh biak dan chuam chuam nei in, nam chuam chuam in kikken maleu hin Lalpa Jesu Khista gingcha zosia huap in pakhat i hui. Kochuam bul pen leh a huapzo pen a kigen unau Catholic-te, Thugin dikpen pawmtu a kigen unau Orthodoxte, gingtute baptisma changsak dikpen a kigen unau Baptist-te, dan zui dikpen a kigen unau Methodist-te, khawmpi (session) leh Upa-leh-pastorte vaihawmna dikpen ti ah kipua Presbyterian kochuamte, sepai guala kipua unau Salvation Army-te, Thagau Thiangtho chu kochuam piandawna ahi tipawl unau Pentecost-te leh a dang

dangte'n, ei Pathian kochuamte kikhen in kichuam gen maleu hin Lalpa Jesu hukdampa ah pawm zosia chu 'Thagau khat' Lalpa khat, baptisma khat leh ginna khat neitute' in i um u'i (Ephesa 4:4).

Chuleh, kochuamte kipumkhatlo a kikhen hi mel-mapa Setan dawilam tak le ahi. Kikhenthâng jengjung a um hi Lalpa Jesu dawidan ahi pua, pumkhat i hitheina ding un ei la pauchap piak ahi. (Johan 17:11). Ziakachun, kochuam dik leh gingtu diktakte chun bangtik lai inle kipumkhatna ding dawilam in a buai pi zing ding ahi. Thagau mi kiti ngal a kipumkhatna ding leh pankhawm ding dawilo puitu chu Thagau mi leh Pathian dawidan lampi jui kitiitheilo ding ahi.

5.ii) Kochuam chu a thiangotho hi(Holy):

Kochuam chu Pathian a, thagau lam kipawlkhawmna ahiziak in a thiangotho ding ahi. Kochuam thiangotho ti umzia diktak chu "chuam kawii" tina ahideu pen hi. Thildang laka kipat lak chuam, thil chuam ding khat a kawichuam tina ahi. Chuleh, kochuam neitu leh

kotu in a thisan thiangotho ah a tat ahi ban ah Pathian chu a thiangotho ahi zia kin, kochuam chu a thiangotho ahi. "La thiangotho ding uh ahi, Kei ka thiangotho ngal a," Lalpan ati ahi (Lev.11: 44).

Kochuam hi Pathian a dinga kikawi chuam bik ahi zia kin a thiangotho ahi. Zia thiangothona hi leichung muthei ah i umlai apat hin a kipat ding ahi. Kochuam dik leh diklo chu a sung ah umte'n Pathian batna anei leh neilo un le a kinga ma ma ahi. Chuleh, "Himaleh, nang uh hung ko pa a thiangotho gual in nang uh le la um dan zosiau in thiangotho tau in. Aziak chu 'nang uh thiangotho un, kei ka thiangotho ngal a, ti jik gual in" (I Peter 1: 15-16). Ahin, tulai ei kochuamte lak a taksa, lungthim leh hindan thiangotho nasa takin i kitasam mama u'i.

5.iii). Kochuam chu huapzo ahi (Catholic):

Lalpa Jesu thina kha leichung pumpi ah mizosia a ding ahi. Ziaguala chun, kochuam leh huapzo tihin kochuam ah chun leichung ah mizosia a huap ahi tina ahi. Pathian kochuam sung ah chun kawil kil li ah mizosia, namtin leh

pautin zosia a huap suak ahi. Thuthung Lui hun lai in Pathian in Israel nam sawm-leh-nite, Ama mite hiding in alatel chuam ahi. Pathian mi hiding in nam dangte leh ei Jentail-te a ding in kinepna mawng mwng a um puai. Ahin, Thuthung Thak kochuam ah chun mizosia a ding in lampi a kihawng zing hi. I thugin un le, “Mi zosia a ding a kochuam thiangtho a um ka taksang hi” ti ahi.

Rev. Lalsawma in, “Huapzo kochuam tichu pawl chuam chuamte danglamna in a sukbuai phaklo leh gam dang leh nam dangte kikhenna in le a sukbuai phaklo, mizosia huapzo ahi” ati ahi. Lalpa Jesu gingcha ah nungjui zosia a ding in kochuam chu a kihawng zing ahi. ‘Ka In chu namtin a ding ahi’ ti ahi. Chuleh, huapzo kochuam ahi diakna chu kochuam sung ah numei, pawsal, a zawng a hau, apil amawl, a lian aneu, kikhenna umlo ah umna mun ahi (Galatia 3:28).

Ahin, a chung ah banglo deu takin, nikhat sap gam Biakin sung ah zu kham khat a valut gua, pastorpa’n nawdaw a gua, amapan “Pu! migilote kikhawpna ding Biakin ei

hil in” ati tai. Zialaitaka chun, Pastorpa’n William Cawper la phuak, “Thisan lui chu ka mu in, lungsiatna in a dim, kumtuang tiang in kang ngaita puan a, migilote silthiangna ding lui” ti lâ a sa dawkta ahi. Tichun, migilopa kiang ah, “Suapi hung in, kumtuang tianga kang ngailo ding la gitlona silthiangna lui tamtak a um hi.” ati ahi. Zia hin kochuam in a huapzaw dan a etsak ahi.

5.iv). kochuam chu Apostol-te thugin leh zilsakna ah kinga ahi.

Kochuam hi Lalpa Jesu phudaw ahia, ziate laka chun Apostolte le a pang ui. Chuleh sawlchakte kha Lalpa Jesu thina leh thawkitna mutute leh hiatpitute ahiau. Ziabanah, Lalpa Jesu’n le Ama sep ban sem dinga a tel leh sawlte ahi ziak un, amau kipat inle kochuam a hung dingto zel thei a, tuni tiang in eimau chung inle kochuam phuna leh zilsakna chu i liangko un a kinga zing ahi. Chuleh, kochuam diktak chu Bible thutak leh Apostol-te thugin diktak pawm leh zuitute ahiau. Nidanglai in kcohuam masaten vai ahawm tak ua le, “Thagau Thiangtho leh kote’n” ti in Pathian Thagau thiangtho umpina

tawh ala kipui zel sek u'i.

6). Bible in kochuam hina a gente:

6. i). Pathian mite:

Thuthung Lui hun a kipat in Pathian in khawvel pum-pi malzawlna peding in mikhat Abraham a tel a, zia kipat chun Israel nam a hung bawl/din tai. Tichun, kum tampi nung in Pathian in Isrealte Aigupta ah a saltanna'u pat in puidawk ding in Mosi a sawl a, a tiam gam Kanaan a puitung hi.

Pathian in ama â ding in mi a tandawk a, ziate chu ginna hawitak nei ding leh, kochuam leh a lalgam a dinga mat ding chu a dawidan ahi. Ziakachun, ko ah i umnau leh Pathian mite ihinau chu ikihiatchian tak tak ding uh ahi. Kochuamte hi khawvel ah nam zosia laka ama a dinga kodawte chu ihu ahi. Thuthung Lui leh Thuthung Thak ah mizosia gawpkhawm in a um a, zia leichung hi suk-siat ahi tianga mihing thak leh thilsiamthak mun chang dinga Pathian in eiguatte chu ihu ahi.

6.ii). Khrist taksa: (Ephesa 1:22-23: I Kor. 12:27).

Zia thumal hi gingtute leh Khrista kikal a taksa pum khat a kizawp khawm dan

genna ahi. Chuleh, Khrista leh gingtute taksa kizawp khawmna chu mihingte taksa kizawm khawmnate sâng ah sangzaw leh thukzaw ahi (Ephesa 5:30). Taksa bak chuam chuamte hinna kibang, utna kibang leh kizawpna kibang a matkhawm uh ahi. Khrista chu luchang ahia, a ziak chu ama chu puitu leh vaihawmtu le ahi. Khrista chu taksa pumpi vaktu ahia, ama pilna in hinkhua ah tup-leh-ngimte zosia le a enkol suak ahi. Hilchetna chuam inle khat-leh-khat kipawimawtua i hidante uh a gen hi. Chuleh, keng in khut kiang ah ka hung pawimaw puai, ati thei puai. Zia guala chun mit inle bil kiang ah ka hung pawimaw puai ati thei diak puai. Pathian in taksa pumpi a bawl a, zia chu kipanpitua leh kithamuan-tua ah a um theina ding un. Chuleh, 1 Korinth 12:15-17- ah lu-leh-taksa pumpi kikal ah kihiatthiam tuana a um a, lu panglo in taksa pumpi'n bangma a bawlthei pua, ahiloleh lu-inle taksa panglo in bangma a bawlthei diak puai.

Kochuam hinkhua ah Khrista i pawimaw mai uh hilo in, Khrista'n le ei hepina ziak in

leichung a mite hukdam ahina dingin ei pawmaw a, a mite leh Kochuamte hina ding in Ama ah i kinga'u in, i kipawimaw tua chiat ui.

6. iii). *Khrist Mo (Thupuan 21:9).*

Kichenna hin mihing pani kikal ah kizawpna chuam diak khat a siamdawk a, hepina tawh kihiatthiamtuana leh kizatuanate'n mani masialna leh mimal hinkhua a sudanglam thei hi. Thuthung Lui hun in Pathian in Isrealte kha a Mo gual in aw nem tak in leh duat tak in a pui zel hi. Thuthung Thak ah Lalpa Jesu Khrist kha mo nei-pa'n a kigen ahi.

Khrist kha mo neitu ahileh mo ding chu ahita diam? Sawlchak Paul in mo chu kochuamte ahi tin ei hil a, Khrista chun a hepina mai hilo in, amau a ding in a thi, hun hungtung ding ah bukim taka gilona bei ah a angsung ah ei ding sak ding ahi. Khrista chu i van Pawsal chun kochuamte chu a hepi a, a khawtua ma ma a, kumtuang hepina, Pathian hepina lamdang tak mai chun thu manglote leh migilote a hepi ahi. Pathian in ei hepina ziakin thim laka i umnau pat leh gitlona leh Setan ah saltan-

nau a pat in, Khrista thina leh thawkitna in ei hung suachak sak tai. Ahin, eimau lam ah kilawmna mawng mawng a mu pua, himaleh a hepina ziakin i sik un a hung kipia ahi. Zia hi hepina ziak ahi. Pathian hepina chu i phatna ding bep uh hilo in, a hepina i mu ding uh le ahi. Hepina chun tup a nei a zia chu thiangtho taka um ding leh dembei ah ama tawh kipak taka um ding chu ahi.

6. iv). *Pathian tempul.*

Thuthung Lui ah Pathian in Isrealte lak a cheng ding ka hi atia, Ama'n a chenna dinga mun atel chu biakbuk sungnung kitina mun ahi. Zia In chu hun chawmkhat a ding bep ahin, phel kit thei ahi. Van puak ah puak thaw thei le ahi. Ahin, Judaten Kanaan gam lam ah a pawthei zel u'i. Zia nunga chun leng Solomon in suang tempul thupi tak mai alam a, Jerusalem ah biakna a um theina ding in Biakbuk thasang dingin. Pathian in zia mun ah chun chen ding ahi dan a gen hi. Chuleh, Thuthung Thak ah Paul in gingtute chu Pathian In ahidan a gen ahi.

Chuleh, zia gual hin a gen a, "La taksau chu Pathi-

an temple, Thagau Thiangtho chenna” ahi ati ahi. I bawn un Pathian tempul i himai bep uh hilo in, mi mal mal ale Thagau Thiangtho hing chenna temple ihu ahi. Pathian chenna In la hiu (1 Korinth 3:9). Paul in le zia gual hin a gen a, kochuamte chu temple thupi tak ahi-dan leh Pathian In ahi dan leh zia chu khawvel tawp hun ah Jesu hung kit phat le sukbutin a um ding ahi.

Pathian Inkuan siamthak kitna chu piang thak ziak mai in Pathian chate i hung hithei un, Pathian in a Thagau in i lungchang uh a hunglua phat le i Pa ahi dan leh a cha hi dinga ei pawm ahidan ei hiatchian sak sek hi. Zia a chung ah Bible changte apat in Pathian chu I pau ahidan leh ei uh hi achate (inkuante) ahidan uh chiang tak in a muthei hi. I bawn-un unau khat, pumkhat i hidan uh le a gen ahi. hepina ziak in Pathian tawh kinaina ahung um a, Pathian mai bep hilo in khat-leh- khat kikal in le kinaina leh kumtuang hinna tawptik neilo ei penailai ahi. Kochuam dik-tak chu Inkuan khat gual i hiu a, Pathian hing Inkuante ihu ahi.

6. v). Thutak khuam leh kingakna (I Tim.3:15).

Thuthung Thak ah zia thumal etsakna um sun chu Paul in Timothi kiang ah a lekha-thawt apat hin ahi. Tumlam gam a mitam tak leh Bible thiam khenkhatte’n hepina chu Khrista nungjuite a dinga a thupi pen ahi ti a gingchau ahi (Johan 13:35). Jesu Khrist kochuamte chun thutak a gen ding uh ahin, tulai tumlam gam ah kochuamte’n Pathian thutak, zangaina leh hepina thu hi a gen uang un, mi dangte kiang in gilo la hi ti a gen tam puau. Pathian ngaidamna hia ah kisikte kiang in nasatakin a gen piak uh ahi. Sawlchak Johan in le Thuthung Thak ah a jik tampen chu Pathian hepina thu hi ahi

Kochuam hi zia khawvel ah Pathian thutak khuam leh kingakna um sun chu ahi. Ziak-achun, zia thu hi a pawimaw ma ma a, Khristian-te a ding in thutak hiatna mai hilo in, thutak ah dinna leh thutak ma ah hinna, chuleh thutak puangzakna le ahi ngal hi.

5. vi). Pathian belamte.

Thuthung Lui ah Pathian kha Israelte belampu leh chingpatia hiat in a um a. Belampu in

a belamte a khawtua gual in, Pathian inle amite chung chiat in le khawtuana tungsak tho ahi. David in Pathian kha a belampu khawtuatu leh hepina ah dim ahidan a hechian ma ma ahi (Sam 23). Pathian in amite belampu ding leh puitu ding a guatte'n a puitheilo phat ua le a lungawilo sek hi. Thuthung Thak ah Khrist kha belampu pha kitina tamtak a um a, chuleh a nungjuite'n le a tinau tamtak a um hi. Chun, nungjuite kha belamte tin a ko ahi. Kochuamte'n belampu khat a nei un zia chu Khrista belampu pha ahi.

Ziabannah, belamte umdan tangpi kha pui ngai leh venbit ngaite ahiu a, gamsate a ding a bailamtak a nekthei le ahiu in, ziakachun a hawn hawn in kawikhawm in a um un, a chingtu khut in nasatak in kinga'u. Lalpa Jesu kha belam chingtu pha ahia, i mawpuaknau chu a kiang ah umjing ding chu ahi. I hinna ding leh bitna ding mai hilo in, Ama puina i pawimaw zing ua, gingtute a dingin apawimaw mama dia-ka, ziaguala kizawp khawmna hin Jesu Khrist chu belampu pha ahin, ei uh hi belamte vak-

tu leh puitute ihu ahi. Khrista chu amite puikhawmtu, belam chingtu'n a belamte a puikhawm gual hi ahi. I hiat ding ua hawi chu Jesu kha belam pu lian pen himaleh(1 Peter 5:14). ama nuai ah belamte enkawl dingin Pastorte, Upate, kitite leh a dang dangte akawi ahi. Ama chu taksa ngei in umtalo maleha thasang in kochuam Upa leh Pastorte ahiloleh kochuam enkawltute a um un, a nasep uh chu Khrista belamte etkawl ahi. Amaute chun a etkawl uh kochuamte An a piak ding ban ua, gindan diklote apat a le avengbit ding uh chu a mawpuaknau ahi.

7). Thukhakna.

Awle, zia a chung ah 'Nicea Thugin' in kochuam hina a gente leh Bible in a gente haw i gentau a. A pawimaw pen leh i daw i pen uh chu eimau inle kochuam hina diktak i hiat na ding uh ahi. Zia ban ah, ihiat thiam ua kochuamte i etkawnau a i pilvang ding uh chu ahi.

.....xXx.....

CHANLAM BEI KOCHUAM

~ *Evan.T.L.Mang Vaiphei*

Sat la sa vanglak lo, lum la lum vanglak lo, lum pel pul

(*Thupuan 3:16*)

Thumasa:

Tulai kochuam chia zel dan hin ngaituana tam tam ei siam piak a, kochuam hat lo leh a pha lo mawng mawng umlo, himaleh, Thagau lam ah kochuam hisel leh hing tak mu ding tamlo khat a hi diam? ti hi ei ngaitua sak a hi. Thupuan bung 2 leh bung 3na sung a hin, hepi Johan kiang ah i Lalpa Jesu Khrista'n kochuam pasagite kiang ah a thupundaw mu thei in a um a, jia kichuam pasagite hi, amau dinmun leh kalsuan dan chiat un dik leh pha hun tawk chiat in a kingai ua, huntawk a kisa ma mau a hi. Himaleh, amau kikawi dan leh kochuam neitu Khrista mu dan a kibang lo hial a hi. Kochuam pasgite lak ah kochuam neitu Khrista pakchak law kochuam a tawmna maizen uh e! **Chanlam bei** kochuam bang a um nalai uh ei vei maw?! Tuni hun in, jia kochuam pasagite a kipat in bang gual kochuam i hi diam uh ti tamlo vak en khawm hitiu.

1. Ephesa kochuam:

Ephesa hi kochuam hing tak leh masawn tak, hepi-na hau kochuam ah tepete leh het in a la um uh a hi. Himaleh, hepi Johan mang ah i Lalpa Jesu'n a kiang ua a thupundaw chu "la hepina masa kha la nusia ta'i." ti a hi ta mai hi. Hepina la nei ta pua, la kipat thak kit uh ngai ding a hi. A chutilochun, "la thaumei kawina hun chawnmang piak ding

ka hi" ti'n hillawkna a bawl a hi. Leng David in, "la hukdam limna kha ei pe kit ta'n" ti ah a pauchapna hi tulai kochuamte taksap leh manaw pen te lak khat hi ding in ka ngaitua hi. I piangthak tau a, i kipak tau a, i lim tau a, thei dan dan in midangte hepina le i la sulang ta him uh a hi. Himaleh, i na pha sep teu sunzawm zo talo, i limnau leh kipakna teu man-sua zo ta, midangte hepina nei

talo, kochuam phawnhal thak kit ngai i hi kha tawl diam uh ti hi ngaitua thak kit hiiu aw. I thaumei kawinau chawnmang piak ding khawp ah hillawkna i mu lona ding un.

2. Smurna kochuam:

Kochuam hing leh dik kipakpi um tak kochuam chu Smurna kochuam hi a hi. Taksa mihing etdan a chun kochuam chaga leh zawngkhal tak gual in a kilang ua, a biak-in uh le pucca hilo, kacha hileh kilawm hial, a chutnau leh a matchak teu le gawpum po kidaw mai mai hikha ding a hi. Himaleh, Lalpa'n mihingte tena dan in a te pua, ama Khrista mitmu a chun kochuam ettawn tak leh kipakpi um a hiu. A kochuam neitu hin a pakcha ma ma a, *_genthei tak leh vaicha tak in kilang maleu chin, thagau lam in la hausau a_* ka hun pakcha a hi, a ti a hi. A lungmuan um ma ma chu, *_hun umpi zing ding ka hi_* a ti hi a hi. Tuni hun in, biak-in building thupi, van matchak thupi, nei leh lam, sum leh pai hi kochuam khangto tena matchak in i mang ua, a dik puai i ti pua, himaleh, a sung lam meima sia leh a nai

in a tuam dim kochuam hisel lo leh damlo a kitam talaw deu hilo a hem? Lalpa umpi tak kochuam hi ding leh umpi zing a tiam piak kochuam hi ding ah i khatlaw thak uh hun rlta hilo a hem?

3. Pergamim kochuam:

Pergamum kochuamte hi tulai kochuamte tawh kibang leh a kilawm hi. I Lalpa'n amau a mu dan chu, *_khawvel tawh kihocham kochuam a hiu_* ti a hi. Setan dona leh thilpha nasepa'n theitawpsua in a pang ua, a Pathian ginnau le a nusia diak puau. Himaleh, Balaam thuhilna zui in, khawvel tawh kihocham in, amau phasakna lampi'n a chia tau a hi. Thuhilna a dawn uh chu, *_nang uh hun do ding ka hi_* ti hi a hi. Kochuam khangto leh na pha semtu i kingai lai a, a kochuam neitu dodal a, ama melma i hi khak ding kiven a pawimaw takzet a hi. Ama'n i nasep leh i thilbawl bangkim a hezing ngal a.

4. Thuatira kochuam:

Amau kochuam hi Jesu'n a teptena chu, *_nekgukna dim kochuam_* ti a hi. Nekguk i gen phat phat ua leh i lungth-

im ua hung kilang pai sek chu, sum a hi. Jia nekguk kiti thum-al hi sum leh pai thu bep hilo in, vaihawmna, nisin hun mat-na, la nasepna la gamtat la khawhei a sukha vek a hi. Sum in la ginum a, hun la mang dik pua, hun la mang dik a, nasep la zuljau a, nasep la gunchu a, vaihawmna'n la diktat pua, jia zosia ah ginum lona chu nekgukna a hi. Aleh, tuni hun in jia thu a hin ka thiang suak hi i ti ngam diam? Lalpa'n hillawkna a piak chu, *_La nasep dung-zui ah hun dit ding ka hi_* ti a hi. Aw...Khrista thisan ah tatsa kochuamte ki-enchian thak kit hitiu e!

5. Sardis kochuam:

Sardis kochuam ta get chu la, amau ngai in kochuam hing leh thupi hi ngei intin uh, hi-maleh, Khrista teptena a chun, *_kochuam thi_* a hi tawp mai ui. Unaupa Khaitinlel la phuak, _a thi hi ngal ah, hing min pu zing, khat um khan'au ngaitua'n a hun lai in_ ti hi amau a hin a dik a hi. Hillawkna a mu'u chu, *_gucha gual ah hun phawng di ka hi_* ti a hi. Gucha hung di hun kuama'n a het lo gual in, kochuam neitu hung di hun

kuama'n a he pua, kiving zing leh ngaichang zing ah kisazo sa um a pawimaw hi. Tulai kochuam tam tak hi sum leh pai i hau man ah kochuam ding ham ham, a sung ah thagau lam limna leh kipakna mu ding um lo, kiningsuk kochuam, Sardis kochuam gual ah kochuam hi ngal, a thi hi i tam kha diam? ti suichian a ngai hi.

6. Philadelphia kochuam:

Amau hi chu kochuam neitu mu dan in demna ding umlo, min-phatna dim, a pha pen leh pakchak um pen te chu a hui. Gunchu tak ah chanchinpha jiak ah thuak ngam a pang zing a hi dan uh a gen piak a hi. Thuhil-na hawi tak a dawng ua, jia chu bang gual haksatna hung tung leh le, *_la lallukhuk ding chu kuama'n a lakpiak lona ding in chingthei un_* ti a hi. Lallukhuk mu ding sa nei kochuam a tepte a hi tau. Kochuam diktak i hinaw mel sulang ngam ding ah kochuamte i kipat thak kit uh hun hi talo a hem? Tulai kochuam tam takte hin, kochuam mel i pu ta puau a, gin-glolute lamdang sak i suak zo tau. Kochuam sung ah meima nai umte silthiang in, damdawi

nu in, tuam dam vak hitiu. Hung nase talaw man kha'n a.

7. Laodikia kochuam:

Jiate hi kochuam lung-siat um tak chu a hiu. Chanlam bei kochuam kiti thumal ka lakdawna chu amau a kipat hi a hi. Kochuam hi ngal, phatchuamna nei lo a hiu. Amau teptena chu, "lum la lum lo, satla sa lo, a vanglak lo" ti a hiu a, chanlam bei, Pathian thu le pangthei, khawvel lam thu le pangthei, hina kichian nei lo te a hiu. Amau kiang ah Lalpa thupuandaw chu, "ka kam ah kipat hun sekdwak di ka hi." ti a hi. Chanlam bei kochuam, chanlam bei gingtu, chanlam bei hotu, chanlam bei thugentute jiak in, kochuam in i melhawinau i mansua tau a, thagau dangchakte a ding ah

an thak piak ding i nei thei ta puau. Setan in i kochuam melhawinau ei suksiat piak zo ta'i. Setan matchak phachuam hi ding in kipe phal ta puai tiu aw! "Man piak ah chawksa i hi tau a, Khrista thisan man te chu i hiu," ti hi khawimun in le tepte zing in, kochuam melhemna tuampha kit ding in, Khrista sepaite kipan thak kit hitiu.

Thutawp:

Lalpa'n panlak thak theina ding in hun lemchang ei pe nalai a, mi vangpha i hiu. Unau, la gingtu hinkhua siamphat ngai tampi nei ngei inla, khawngai sawt kin la, hung kipan inla, Khrista a ding in la vak hun sua thak kit ta'n. Lalpa'n a ngak zing hi.

.....XXx.....

DAMNA AW LAKMAN

Awle kum 2019 hi bei vang vang ta, Damna Aw lakman pia tam tak a um tau a, kipak um khawp mai hi. Ngainatu tamtakte'n tawmngai a sua zinglai un khenkhatte kum 2018 ale penailo a ki um hi. Damna Aw lakman hi a kumsung ngei ah piak kimjel hi duthusam ahin, kum 2018-19 lakman penailote'n petai tiu le.

~Editor

KOCHUAM IN BAWLLO DING I BAWLTE'U

~ *Evan. L. Khotinthang*

THUMAPUI:

Inam sung ua kochuam ah ila kikhen tel nau hi hawitaka i ngaitua a i khualchil le **doctrinal crisis** ziak leh **theological differences** ziak ala hi puai. *Pu leh pate kochuam umna sa (denomination) ngawlp i a zia kochuam hi ahilo leh ka Pathian ho ka haisan ding ahi tihaw min kigendawk leh la khat kiphin dawk khantin maw!*

Amavang eima a ding bik a lalgam khat tundawna ding ngaituana in ila kikhen zak uh ahi bep hi kiti le kigenkhial sam puan a. Kochuam (denomination) ah i kikhen nau hin bangtiang in ei usia em tih ala ngaitua khawm hitiu.

1. Eimite'n Khrista sang in denomination thupizawn i lagam zaw tau. Zia hi Lalpa i do nau ahilam helo i hui em?

2. Lalpa nasemtu sang in denomination nasemtu nitin in apung jing e. Ziakachun, i kikal un kituaklona, denomination ah kidemtuana nitin in apung tul tul hi.

3. Nungjuite guala Khrista thipi ngam ding a umta puan, amavang denomination min'a thi ngam a kivat tapuai tithei khawp hial in hinkhua i mang gam tau hi.

4. Denomination ah i kikhen tel phat un Lalpa ah kipat KONA chang diktak haw le

ngaisaklona a hung pungtan, zia haw sang ah chun eima U leh Naute a ding in mun i pezaw tau hi. Ziakahin, Pathian lalgam keklet malak a i suneu deu deu jiang tau ahi.

5. Denomination ah i kikhen tel phat un Lunggil tak'a Bible ala simhaw ding inle mun a neu ma ma tai.

6. Denomination ah i kikhentel ziak un midiklo haw chu thunun dinga kilawm ma ma khat chu thununna in i kawi ngam ta puau.

7. Denomination ah i kikhen ziak un Kochuam ah nasemtute le ahangan ngam tapuau in, mipi lungawina ding

bep i buaipi gam tau hi, kiti le a dikmawna ding tambek puana.

8. Denomination ah i kikhenthiak un Thagau mangthai nganatna a tawm ma ma tai.

9. Denomination hi tulai i gam ua i ha gen pen uh KANI kiti haw sang inle a khawkna leh a siatna a sangzaw ahi.

10. Belam mangthai ding khat chu Lalpa huang sung ah puilut sang in Belam kiguk piaktuana (competition) i bawl tau in ziaka chun i mipiteu chu i sulungzing gam tau ahi.

Denomination ah kikhenna'n a sukkhakte chu:

a. Kochuam sung ah Pathian lopina a kilang dawczo tapuai.

b. Kochuam in dan leh mual i neiteu le a hi ding gual tak in i chiapi thei tapuai.

c. Kidona leh kimelmatna i lak un a hung tamzaw ta ahi.

e. Mipite'n le kochuam ah nasemte haw chu mu neuna tak khat a hung nei tau ahi.

f. Thagau lam liangvaina a hung tut tan Path-

ian thu lam'a i-al dawczo him him ta puau hi.

THUKHAKNA:

Denomination hi poison zosia chung ah poison sang pen chu ahi. Zia lungthim hin Van ah kumtuang go ei mu saklo ding ahi helo ihu em?

Miching leh mithiamte'n "Unity in diversity" (Kibung khenna ah kipun khawmna) a chiapi thei un, eihawn vang i chiapi thei puau ahi.

Jesu Khrista khang'a sakhua (denomination) ala ngawlp; Sadducees haw leh Pharisees hawn Khrista ala do nau lungput chu ei uh lak'a le a hung tung tai.

Zia hin a hung gasua chu Belam kiguk piaktuana chawndan hi ahi. Zia hi i nutsiau a, thagau mangthai matna ah ikitaitek ding uh hi Khrista'n ei dawisakna'u leh ei ngansi ana'u chu ahizaw'i

Tichun, kilungtuakna ei piantin, ziaphat chuleh Pathian ah kipat in malzawl-na ga i luakdiu ahi tai.

.....xXx.....

TULAI THIL UM DAN TE HIA IN, IPMU LAITE THAW HAL A HUN TAK ZET TAI = II (India gama Hindu te malak dan)

~ Mr. Benmuan
Inglonpoh Mission School
Longnit Karbi Anglong

Tulai ah India gamsunga pau kilak tak mai “Hindutva” hung kipat dan neu khat en khawm leh hin ka nuam hi. Kim takin gen theilo maleh hin atangpi hi ding ahi.

Hinduism hi thikthusialo leh phatlon a neilo sakhua tin a kisanpi ma ma ui. George Ninan chun Hinduism hi kum zabi 19th lai vela “Religious Movement” apat sakhaw mumal guala hung kipan dawkbep hi in angai hi. Kum 1875 a Swamy Dayananda phudaw “Arya Samaj” kha Hindu Fundamentalist Movement chiat a, tulai gual in thagum suana lam panglo ahi. Swamy Dayananda hi India gam ah Kristian leh Islam sakhaw sukbei ut ahi.

Kum 1925 hung ki hei dawkin Dr. Keshav Baliram Hedgewar hin pawl thak khat siam in, 1927 kum in amin ding in Rastriya Swayamsevak Sangh (RSS) a sak hi. Hin-

du Mahasabha, Jana Sangh (Khaw nunga BJP hung hita) Vishwa Hindu Parishad (VHP) leh adang dang Bajrang Dal, Shiv Sena, Brahma Kumari te hung pawt jel in, a pumpiu ahin “Sangh Parivar” mi vek ahi. Zia laka hin RSS hi a ding masa leh a zabawl pen uh ahi.

Kum zabi 20th na bul lam a khan Hindute laka Hindu Lalgam (Hindu Rashtra) din ut na lungthim hung piang in, pan nasa takin alau hi. Maleh masawanna lian tak mu ding um tak tak theilo in a um ui, a ziak chu British nuai a um ahi ziak un a dawigual un pan ala thei puau.

Zia “Hindu Rashtra” din ut na hin “Hindu Nationalism” hung piang kit in, amin ding thumal neilo a um in, V.D. Savarka in “Hindutva” ti thumal ahung mat chu chia zawm jel in a mang theng tau ahi. British te pawt nungin, “Hindu Nationalism” chu hung hat deu deu in,

khlanglai tam takin a hun zawm to jel un, Volunteer te hung ki siam in, pan ahun la tak tak tau hi. RSS (National Volunteer Organization) chu ahung hat ta ma ma in, tichun India independent nungin RSS te hin pawl chuam chuam-Politics lam, Khawtang hindan siamphatna lam, Zillai lam, Trade Union lam leh adang dang siam be jel in ma ahun sawn ma ma jiang tau. Pawl chuam chuamte hin RSS te dinpi pen “Hindutva” thu hi a pet mang san ngai puau. Hindutva ngai pawimaw pen a nei kawm kawm jel in political party pakhat “Jana Sangh” chu 1952 kum in a hun din tau a, haksatna tam tak pal tojel in, 1980 kum in Bharatya Janata Party-Indian Peoples’ Party ti in amin uh a hung theng ua, tu tiang hin a chiajel ui.

Hindu Rashtra dinna dinga mi pawimaw ma ma khat MS Golwalker chun, kum 1942 akhan ti hin a gen hi “Kristiante leh Muslimte hi gam dang mi ahiu, Hindu sakhua a aki nunglekit nawplo ua leh dikna chanvo (right) hi nei theilo ding ahiu” Kristian leh Muslim hi a suk mit/bei thei phawt uh ahi chun India hi Hindu lalgam

hi thei mai ding in ngai dan det tak a nei uh ahi.

HINDUTVA AGENDA PAWI PAWIMAW KHEN KHAT :

1. Uniform Civil Code:

India hi gam khat hi-maleh a michengte hi sakhaw chuam chuam ahi ziak in, nisin hindan a pui huaitu ding in mani sakhua ziltina hi mat chiat ahi. Etsakkan, Muslim ten, Independent ma apat in “Sharia Law” leh “Muslim Personal Law” hi sukdanglam um lo in a mang jing ui. Zia gual hi Hindutva ngai pawimawhte hin ti gual hi a dawu puau. Hindu sakhua dan a kinga ding, nisin hindan mun khata umding hi atangkopi nasa ma mau hi.

2. Saffronization of education:

RSS leh a kithugualpi te hin India gama zilna (Education) hi a en tha jing un, Hindu deu mai a - zilna hi chiapi a nuam ui. Hindu deu mai, iti lai in, amau chun Indian deu in (Indianize/nationalize), Thagau deu in (spiritualize), Sanskrit deu in (sanskritize) ti in a gen jaw sek un, atup uh chu “Hindu deu mai in (dan dik tak mai in)ti taw thu ki bang vek ahi tho tho hi. Van tang hiat ah

atup uh sel gukna mai mai ahi. Tiguala a malaknau hi “Saf-ronization of Education” ti ahi. Mi khenkhat ngai dan a chun Kristian Mission malak dan apat azildaw uh hi ngai pawl le a um hi. Lekhabu sunga a pathian teu, a sakhaw gindan uh kilangmtaka taklat lam sangga India chanchin lui (History) leh chawndan (Culture) a thupi thei pen a puan daw a, zillai naupangte lungthima thuk taka chi tu a guat uh ahi.. Ziaziaka chun, India gam sunga lekhabu (Textbook) buaipitu- Indian Council of Historical Research (ICHR), National Council of Educational Research and Training (NCERT) leh Indian Council of Social Science Research (ICSSR) enkawltu dinga hin “Hindutva” thuthunga tui te hi a guat sek uh ahi.

Lekhabu –Hindu deu a-siamna ding ahin India Dan Bu Article 30 hin dal deu a ahiaht ziaht un siam phat (Amend) a ut ma mau hi. Zia hi suk danglam thei uh ahi chun Mission School/College kivaipuakna hin Sawlkar kigawl thei a siam a ut uh ahi. Sansikrit, Vedas, Upanishad, Indian Science, Indian mathematics leh Yoga hi

zillai bu a pan sak hi a dawid dan uh ahi. (D. El. Ed zilten hechian ma ma in tin u, Diphu a Missionary bang hem jat D. El. Ed zilten le ut ziaht hilo in Yoga hi bawl a ngai hi, Yoga bawl ni a kailote chu a liau sak kit un pe lo leula Result lam a buai kit ding).

3.Tribalte (Thingtangmite)-Hindu deu a siam :

AD 2022 tianga India gama cheng zosia Hindu suaksak vek ding tup a nei in RSS ten pan ala jing un, India gam sunga thingtangmi tam tak Kristian Mission ziaht Kristian a um ahiaht ti he jing in, Kristianna nusia a pi leh pu sakhua lui jui kit theina ding in guanggalna kit-up tak siam in, mun khenkhat a chun Hindu sakhua lawp lut kitna le anei ui. Tigual a malai gindan taw Hindu gindan siam lemna dinga pan alakna ding un, Mission pathum anei uh ahi. Shuddhi (Sukthianthona) Ghar Wapsi (Hindu a kinung le na) leh Parivartan (kithenna) te ahi. GharWapsi hi sum tam tak sengin 80,000 vei vel ala bawl tau. Kristian tamtak Hindu a nung lak kit in a um hi.

Etsaknan: Arunachal Pradesh, Changlang District mite hi

“Rangfra” sakhaw jui leh Karbi Anglong a cheng, Karbi te “Honghari” sakhaw jui ahiu a, Hindu taw kimatna nei a ngaina lianpi a um hi, amau l dawt leh Hindu ka hiu aki ti mai un, Mandir a ki thawi ngailo, khawitak hem lem changa ki thawi mai ahiu. Amau haw Hindu sakhua umdan hi chu mak deu mai ahiu.

Zia Mission lawtinna dinga hin RSS nuai a pawl pakhat “ Vanavasi Kalyan Ashram” (VKA) ten India gam sunga thingtangmite lakin na ahasep ma mau hi. Guwahaty mun in 2002 akhan Tribal leh Nam thil humbit pawl “ Jana Faith & Culture Protection Forum” din ahi. Mizoram ngei inle “Mizo Janajati Vikas Samiti” chu 2005 a khan din ahin, naupang tamtak lekha zil dingin gam lai lam a thawt ahiu in, kuan masa, ziljo masa hung kitte chun 2013 a khan “Zo sakhua” ti din thak kit in agen uh ahi. Zia tigual ahin thingtangmite lak in Hindu ten na aha sep ma mau hi.

4. Politics a thuneina chan :

Hindutva Movement ahung pat ua aki pat atup pen teu laka khat chu politics

a thunei na chan ding hi le apang hi. Tu ahin RSS te apat piang dawk, BJP chu India a vaihawmna chang in, Parliament (Lok Sabha) ale member nei tam pen ahiu. Hindutva thil tup alawtin theina ding leh a chia jel theina dinga BJP hi Political Front ahi jia kin thapi thaw in pan alau hi. RSS te taw pangkhawm jing ahi jia k un, ahinau dik tak he jing kawm a et thiam pawl maw ma ma ding ahi. Kristiante thujaw theina ding in, State khenkhat a chun gamthiangtho jinna sen leh so ding zosia sen piak ding in ala kipha niam uh ahi.

5. Sakhaw neuzawte humbit theina dan sukbei di :

Khawvel ahin Kristian te hi atam pen himaleh India gam ahin vang atam sam puai. India a hung zalen apat khan sakhaw chuam chuamte a tam atawm umlo in, kigual taka l chia theina ding un, danbu hawitak mai nei in, atawmzaw te humbitna ding dan hawitak a um hi. Danbupi sunga Kristiante a dinga ki humbut theina umte chu, Article 25, Article 30 leh Article 51 te hi ahi. Zia dante (Article te hi) hi Hindutva buaipi pawl chuam chuam

te hin ngaithei lo in, suk bei ut ahiu. Tuhin vaihawmna inpi ni a member hau pen ahung hi tau a, zia dante haw hi hung theng danglam ngei dingun ginchak na lianpi a um hi.

6. Gamdang apat panpina hung lutte tingtan di :

India gamsunga Kris-tiante hin, Mission na asepa theina ding un, gamdang apat panpina nasa tak a dawng sek un, a bikin Europe leh America apat ahi. Zia sum leh pai a dawnteu chun Project lian tak tak sem in, school, college leh hospital din in na asem sek uh

ahi. Maleh zia panpina sum te chu Central Govt a Home Ministry chun Foreign Contribution Regulation Acts (FCRA) mangchan a ting tan tau a, Para-church nasepna tam tak a buai jak gawp tau. Maban sawn mumal thei o in a kawi tau hi.

Zia hi Hindu ten I gamsunga pan alak danteu tam tak laka neu khat, kimlo deu a I taklat theite chu ahia. Simtuten lampi khat bek a phat chuamna I nei khak uh leh ti in bukimlo deu in ka hung tak lang ahi.

.....xXx.....

MI NETHEI AH KIPAT IN MI NEK DING AHUNG PAWT HI

*~Mr. Pauthiansang
Serampore College*

Zia thuching “Mi ne thei ah kipat in mi nek ding ahung pawt hi. Mi thahâtpa ah kipat in thum tak a hung pawt hi,” ti hi’n tulai ka lungthim a lua dim khawp mai ah, ngaituana tamtak le ei pia’n ka he bawk ahi. Zia thuching hi Samson in Timnah khua ah nungak hel ah achiana, lamkal ah sakeibaknei ala tha sa luang sung ah khaizu thum tak a mu, anek hun ah ahung hetdaw ahi. (Vaihawmte 14:1-14) Zia thu hi, tuni hun ahi’n, Bible hilchianna leh a umzia diktak khualchianna lam sang in, et dan chuam in, gingtute thagau lam ah kal I suanna lampi hi kaww sak in, chawm chan vak ngaitua khawm leu hin I nuam ahi.

Amasa pen in, gingtute thagau a kal l suanna lam pi'u ahi'n, l mamaw pen uh leh l pawimaw pen uh chu thagau lam an hi ahi kiti henla hileh, kigen khial khel din ka gingchalo ahi. Ahinla, zia thagau lam an chu l mamaw pen uh leh l pawimaw pen uh ahi zing lai in, khawi ah hung kipan ah bangti mu ding ahem ti hi, ila ngaitua hemil kha sek ua. A khawk khop mai!

Mi tamtak te'n, limna leh kipaknate chau ahi'n thagau lam malsawmna hi dawng gual in l ki ngai ua, haksatna leh beidawanna, l taksa leh l lungthim ei nesia theite chu thagau lam ah ei kaihek-tu leh ei negap tu mai in l gel kha sek uh ahi. Ahinla, thagau ah malsawmna hi, limna leh kipakna munsang in, haksatna leh beidawanna; lungngaina leh kâ na, mihing in genthei um ah l la ngaina mun ahte hi'n Lalpa'n ala kawi nuam zaw sek hi. Zia thuguk chu hetchian a pawimaw tak zet ah, maleh zia thuguk chu l hetchianthei seklo ziak un, haksatna leh beidawnate hi pumpel gua in pan l la ham ham sek ua, l pumpel theilo phat ua leh ki ngaisia'n, chau leh basam in l puk tha mai sek

uh ahi.

Ka ngaitua sek ah, gingu nun kal suanna lampi hi, haksatna leh beidawna, lungngaina leh kâ na te'n ei tuam phat leh, hetthiam hi a haksama ma sek hi, maleh laphuaktu'n "ka gentheina limna'n achang tai; Pa thununna ka thawk mualsua nung in" ati gual in, thuk ham ham ah ala hetthiam gaw tun tun tute ading a chun limna leh kipakna ni chu a hung suak kit ngei sek ah, chuleh zia haksatna leh beidawanna guam ah te chun Lalpa'n ei kawi piak khuizu thum tak mai chu ahung luangdawk sek hi. Tichun, Zia thuguk muchiantute chun, a gentheina'u leh a kâ nate'u chu "kei ma'n vangsiatna ah ka ngai, maleh Lalpa'n a hepina suklatna matchak ah amat" ati thei sek uh ahi. Zia gual mite chun a nun ua haksatna leh beidawanna, lungngaina leh kâ na hung tung sek; a taksa'u leh a lungthim uh nesia theite chu thagau lam ah nek ding ei petu ahi ti'n apawm thiam thei sek ua, tichun a lungngaina'u leh a kâ nate'u chu limna leh kipakna'n a hung chang thei sek hi.

Zia bep chule hilo in, zia haksatna apat kuaizu

thumtak hung luang dawk chu ne in zawna chu a chang sek un, zia haksatna ma apat chun kipak tak in Pathian pak in a chawihawi thei sek uh ahi. Ziaziakchun, haksatna leh beidawngna mat dan thiam hi a pawimaw tak zet ahi. A ziak chu Lalpa'n zia tak achun l nek ding uh thagau lam an, khuaizu thumtak mai chu ei la kawi piak sek ahi ngal ah.

Zia thuguk hi ka ngai-tua phat leh ka lungthim ahin sawlchak Paul nun hi ahung kilang vawng vawng seka. A haksatna leh a gentheina; ataksa a ling um chu la mang ding in Pathian kiang in thum-vei hial ala dawn a, maleh Lalpa chun "Ka hepina nang â di'n a hun hi, ka thilhitheina hi hâtlna sukbukim ah um sek ahi" ti'n ala dawn hu a. Tichun sawlchak Paul chun, ne thei ah kipat nek ding hung pawt chu mu in, "Khrista thilhitheina chu ka chung ah a um theina dingin, kipak tak in ka hatlonate hi suang zaw ta'ng ka. Khrista zia kin hatlonate, hosiatnate, châtganate, sukgentheinate leh buainate ah hin ka kipak sek hi; ka hâtlo phat si'n leh ka hat sek

ngal a" a la ti ahi. Aw khai lopi chu ka vaksa na lawm lawm e! Sawlchak Paul hin Khrista thilhitheina a chung a kilat theina dinga, a haksat na leh a lungngainate ah chun "ka kipak sek hi" avak tithei ziang hi. Zia gual ding chu a la hi him ahi. Haksatna leh bedawanna munte ahin kipakna um, muchian hi akul takzet ahi.

Ziaziakchun, tuni hun ahin, Lalpa'n nang leh kei le hatsatna leh beidawnnate ahin, kipak thei ding in ei dawi a, l hatlonate haw chu thagau lam ah hatna a mang ding leh ei ne thei a kipat nek ding hung pawt chu muchian thei ding in ei dawi ahi. Bang gual in haksa in genthei um sek maleh, l hatnateu hilo in l hatlonateu chu suang in, thagau ah basamlo ah i um theina ding un, l haksatna'u leh l beidawanna'u, l taksa'u leh l lungthim uh ne sethei ah kipat in nek ding thagau lam an chuhawl l gaw ham ham zaw ding uh ahi.

Lalpa'n simtute, haksatna mun ah thagau lam an; khuaizu thum tak um chu muchian chiat thei di'n ei malsawm ta hen.

Khrista ah Ga suading in Awle!

~Pastor James Th. Minlun

Himaleh Thagau ga chu, hepina, kipakna, chamna, dawtheina, nunnemna, phatna, ginumna, thunuaigolna, leh kisum theina ziate tawh kikal hi dan dang aum puai.(Gal.5:22-23)

Buchi the pakhat buchi the dingin akuan ah, athe leh khenkhat lamgei in aketha, chawt lulet in aum a chungleng vachaten ahung luaknam tau a. Akhenkhat chu suangteu chung in aketha ahung kek sam ah himaleh lei anawm bangma aumlo ziak in ahung keugawp kit paitai. Chuleh khenkhat chu hampa lingnei lak in aketha, hampa lingnei te chu tawh ahung kek khawm in ahun dep mang kit tai. Adang khen khat chu leiphatna'n akiau ah ahung kek un ga ahun suau ah khenkhat ale zakhat in ahung pung ah khenkhat chu la sawmguk in khenkhat chu le sawmthum in ga ahunsua tai atia. Zia sia chu agen zaw phat in ahung kiko ah Kuale hiatna ding nakhang nei chun he tau hen atia. (Mtt..13;3-9.Lk. 8;4-8)

I gam Christian za ah za kiti gam hi thagau thai chi akitu tam tāk maizen tawh akitu atam gun in aga mu ding atawm mama nalai dingin ka ngaitua hi. Bangziak ahi diam? Tuni hin Jesu'n theichang kung aga ava hawl gual in gingtute lak ah thagau ga hung hawl ding hitaleh tu kipat kuama'n la ga nekit ta kihen ati ding ga neilo gingtu leh Lalpa'n a ipla ngawi ngawi phuk maitan a umna lei mun a pam mai hi atidi a kitamna ding e maw?

Ga phatak neiding in, hinna nei mai hi ahun pua, hin hawitak ah ahin (Hinpha) angai ahi. Gapha suathei ding leh hinpha a hin theina ding in a

kena mun munpha a pawimaw ah, chun ahun hun ah gua leh dai, thim leh vak, nisa leh hui, leh leiphatnate le apawimaw bawk hi. Zia a pawimawte a huntak ah a mutheina ding in "Hepu leiphatna hun vuk ka tin, tukum bek ngak ham ham nalai in, zia ka bawl nung ah ga asua diaklo leh phuk mai in tithei ding enkawltu apawimaw ahi.

Chanchninpha igam ah akigen tam mama na, daw-igual ah ga asua theilona ziak hi Bible ah i mu gualma in a kena mun bang gual ahem vak en hitiu.

(1). Lamgei:

Thai chi chu I tuding ahi

chun alei chawbuat/kalbuat masak ah a thai chi chu vuitum ngai ahi. Langei chu chawbuat ahi pua, chawt lumletna mun ahi ziak in alei atâk in azawl ah, thai chite chu mu mai thei ding in alangsar mama ah, chawt lumlet/pal lumlet ahi ziak in lei atâk tawh zung akai man a kipal lumlet kit ah, zung kaimanlo in vachate'n ala luak nâm man sek ahi.

Tulai gingu hinkhua tamtak hi, kalbuatlona mun gitlona'n achawt lumlet takluat ziak ah tâk talua, Pathian thu kivuitum zotalo, khawmpi, revival crusade, nibik ni tivel ah langsar mama, adang ah muphak ding ah umlo, asunglam, langlo lam ah zungkai manlo khawmpi ahem kipun khawmna ahung kichai leh program tawh kichai khawm mai, (vacha'n aluaknam mai) gasua malak a kek dawak manlo gingu akitam taluata ahi. Ga i sua theina ding leh i ga a um zing theina ding in gitlona'n l lungthim leh i taksa achawt lumletna ah lungthim tâk taluate hi Pathian thu ah i kalbuat ah Pathian thu ma ah i kivuitum pawimaw ahi. Pathian thu ah ki vuitum taktakna ding in alangsarna mun bep hi a hunlo ahi. Pathian thu ah

kivuitum ah mani bep Pathian tawh kipawlna hi a pawimaw zaw ahi.

(2). Suangteu chung:

Suangteu kiti chu asuangpek langlo bep ah lei in akhu tina ahi. Leipek hingal anuai mutheilona ah suangpek um, Lo kal lai ah kaldawlo ah um tina ahi. Vak et mai in suang chu kilanglo ahiziak in thaichi tuna ding ah etla umtak mun ahi. Ahinla ahina tak ihi-at leh vang etla um keilo mun ahi. Etla umtak mun thaichi chîn theina mun ahung hitheina ding in anuai ah suang chu kaldaw ngai ahi. Kaldawlo chun bangzat thaichi the le hinle aga nekding kilo ngailo ding ahi.

Tulai gingu tamtak mutheilo/alanglo ah gitlona neizing pawlam ah kilawmtak ah umchan thawkawm, (acting) vak et ding ah awchâk umtak hileh kilawm himaleh, ama leh ama ziang le lungthim thawmhau mama, ga tampi sua gua ahinla, gasua thei ma malo, kilawmtak ah sawmakhat leh thawlawm piak ding dawl kilawmte piazing, biak in kaina lam ah gunchu mama, gingu khat bawl ding ah kilawm cheng bawl zing ngal, Pathian mitmu leh mihing mitmu ah ga

muding um mawng mawnglo ihi khak chun kingaitua thak in, kuama mulo ah gitlona guk, ei ah kiselgu um khat to himaithei ahi. Gitlona hawlo mualpho lau maimai gingtu chun thagau ga phatak ahung ga dawking kinep aum puai. Lalpa ading ah ga isua nuam tak tak ahi chun haksa maleh eima ah, I sunglam ah gitlona umte kaldawk phawt leuhin, leipha tak hung hintin thaichi i tulutte chun Khrista ah zung hung kai in tin uh mihing mitmu leh Pathian mitmu in ga tamtak sua in, eima ading leh i kim i kiang ah umte dingin phatchuamna leh a huan neipa Lalpa Jesu ading in kipakpi um leh huan nei man um hiding ihu.

(3). Hampa lingnei lak:

Hampa lingnei hi thaichi a ding ah apet pet ah thina ahi ziang pua, munkhat/thakhat ah kek khawm, khang khawm ahia, vak et mai in hampa lingnei hin hun deplum ziang thei ding in akilawmlo ahi. Ahin, thakhat in vang ahun deplum zianglo ma ahi. Maleh awl awl ah hung khang khawm ua aga sua-na ding a hungdal pan in, atawp leh hun khan khel in, ahun dep lum sek ahi. Alim in vang hampa ling-

nei chu thaichite a ding in lau um leh thil lian lawm lawm ahi sam puai. Maleh, ahun a hung sawt phat/ ahung pitin phat ua leh thaichi sang in hampa lingnei chu apianken him ah le alianzaw, a hamzaw, khangzaw bawak ahizak in thaichi a ding in gasua theilona leh ama thattu'n a hungpang sek ahi.

Gingtute a ding in thagau lam ah ga isua theilona leh I thagau hin zawlona hi thil thupi leh lianpi ah i ngailo i kisuk khakpi, i um khawmpi lau um lawm lawm ale kilanglo khamthei chi chuam chuam, chep leh muam kuwa tihaw hi ahi. Alim in thupi tak ahi sam pua, ginna le sukha leh kilawmlo tak chu ahia, himaleh ahung pitin phat ua hai theilo ah ahung um un a tak-sau ahun nepan ah nial guallo in I thagau gasua theilona ziak hi zia thil neucha cha te hi ahipuai iti theilo ahi.

Nikhat hi kochuam ah hotu khat dik kisa ve tawak khat in ziagual hin eidawng ah, Pastor pa Pathian thu la gen cheng leh chep leh muam hi laha gen mama sek ah mi private life nang la bang asukha em? Ziate hin van gam kaina ding adal em? Kuama sia leh pha helo a um puai. Ziate hi la

hagen leh kuaman la thugen ngai peilo di ahi, eitia.

Ziagual hin ka dawn hu ah, Ahi, mi personal life ahina'i, min ka thugen le ngai nuamlo ding ahi tile ka he tho nai, mi ngainawp ding ah thusim gengua le ka hidiak pua, Pathian thianthona gen nuam zaw ka hi. Thianthona hi Pathian hina ahia, Pathian hina gen mai ka hi. Israelte bawn Pathian mu ding in a theichan un a kisuthiang ua ka thiang tawk tai akiti nung un Lalpa mel mungam malak in athawm ahia mai unle atuitha mai uh ahikha! Mose nang tawh kimu mai un Lalpa mel chu mu leng thizo mai ding ka hui ati mai uh ahi. Nang leh kei kiging lawklo hial ah hiti neunou ah Lalpa mai mu ngam ding i hinaw em?

Bible ah Pathian tawh kizawmte hawi takin vak enthak hitiu. Pathian athiangtho hi, (1 sam2:2). Pathian min a thiangtho hi(Lk1:49). Lalpa Pathian chenna In athiangtho hi (Isai 57:15). Pathian thu athiangtho hi (Rom1:1-2). Van sawlchakte athiangtho hi (Mtt.25:31). Lalpa Jesu a thiangtho hi (John 14:26). Zawlneite le a thiangtho hi(Lk 1:70). Pathian tawh kizawm(related)

zosia a thiangtho ahi. Pathian tawh kizawm i hile thiantho chu ikizil ding mawng ahi. Kuama chu thiangtho chamkim aum diak pua, himaleh a theichan ah ama bang ding ah i kisinsak ding ahi. Mithiangthote tawh van mun thiangtho ah umkham ding ah kisinsate ihu ah, ziagual ah buak neunou ah iki sak uh hi kilawmlo bep hilo in thil hithei ding ahi puai. Vanmun thiangtho ah chun kuwa tui siatna ding beri bawng pai na ding, khaini che paina ding um di'n ka gingcha puai.

Conclusion:

Tuni'n nang khawitak hi la dinmun ahem? Leiphatna mun ah kek ah ga lezakhat le sawmguk leh le sawmthum sua la hi em? or Lamgei ah vachate luaknam mai mai, or suangteu chung ah kia kek pai, gawptha pai mai, or Hampa lingnei lak ah thi la thilo, ga la sualo lahikha em? Thagau ga chi kua te lakin nang ah bangzat ga in la kihe em? Bang gual ga punsak theiding in la ngai tua em?

Lalpa'n ga suading leh iga umzing ding in zia thupi mang ah I holimna mal ei zawl piak taken! Amen.

Easter Brother-te chanchin

~Rev. Lienthienmang

Easter brothers kitite hi unau pathum ahiu a, amau hi ma-sang lai 1950's leh 60's hunlai ah lathiam minthang mama ala hiu. Pathian lâ tampi phuak in ala sau hi. Easter brother te hi 'The Green Valley Quartet' or 'The Easter Brothers' ti'n le het lar ala hiu a, amau hi quartet lar leh minthang tutianga lâ ala phuak uh leh asak uh chultheilo mangtheilo khangthakte lungthim khawi mama te ala hizing ahi.

1. Easter Brother hi kuate ahiu em?

Easter brother or the green Valley Quartet-te hi unau pathum band or group a kisiyam a Pathian Lâ phuak le sasekte ahiu. Amau chu ahileh; Rusell Lee Easter, James Madison Easter leh Edward Franklin Easter te ahiu. Amau inkuan hi Mount Airy North Carolina United States of America ah a cheng un; amasapen ding in Rusell in band neucha asi-am a, zia band chu anung in a naute'n ahung zawm uh ahi. Zia band neucha zawnung in 1954 in the Easter brother or the Green Quartet Valley ahung phut dawk ua zia chu a band dik tak uh a unau ua ahung minthang dawna'u chu ahi.

2. Easter Brother or the Green

Quartet Valley band hung kipat dan:

Easter brothers or the Green Quartet Valley te unau hi insung haksa leh genthei mama ahiziak un a aneu lai ua apa'n guitar lian siamkawm a bawlpiak a, music abik in guitar zat chuam chuam pek dan azil sak sek hi. A diak in a unau lak ua upa pen Rusell hi apa zilsakna a kipat thiam ahia, Rusell hin anaute Guitter thiam ding dawi in azilsak sek hi.

Ziate unau hi aneu lai ua kipat in Bluegrass gospel music leh Bluegrass gospel band te hi ala ngaisang mama ua, zia band hi a ettawn pen uh leh a idol uh ahung suak tai. Zia Bluegrass band te a kipat hin phurna liantak le chona thak amau lungthim sung ah hung piang in Easter Brothers

or the Green Quaterd Valley band minthang leh hetmiltheilo khangthakte a ding tiang ale la dawî um leh lungthim khawi ahung hinalai hi. A hun masa lam ua chun mi Lâ phuak le mi Lâ siamsate sa in radio leh televesion vel in aki pho dawk ua, zia hunlai ahin mi het phak bek bek ahi nai puau a, himaleh Easter brother te hin amau Lâ phuak ngei hung nei in amau phuak ngei amau band min a ahung sak phat un khawvel ah mi zosia het in a Lâ phuak uh leh a lasak uh hi ahung minthang tai. Zia a Lâ phuak uh leh a Lâ sak uh hi tu tiang in mipi tamtak lungthim khawi, kana, kipakna leh thamuantu ahung suak tai. A Lâ phuak leh sak uh minthang mama khen khat te chu: “Thank you Lord for Your Blessing on Me”, “The Darkest Hour”, “They are Holding Up the Ladder” leh adang dangte ahi. Easter brothers te hin recording 150 val a nei ua, kum 40 sung veng veng chawllo in Pathian Lâ sa in Pathian na asem uh ahi.

3. Easter Brothers te hinkhua:

Easter brother te unau hi genthei tak leh haksa taka

hinkhua mang ala hiu a. Anu leh Apa chanchin le gendan chuam chuam leh zikdan chuam chuam a um a, zia lam chu ngaisaklo in, tuni i dawipen leh ihet ut pen chu zia Easter brother te unau chanchin apat hin bang izil dawk thei em tilam nga'n zik ding ihu.

Easter Brothers te unau hinkhua hi khen ding hileng chini lam a khen thei ding ahi. Ziate chu: (i) Easter Brothers te unau Pianthak masang leh (ii) Easter Brother te unau pianthak nung ahi. Tuni ziate unau hinkhua a ivak gen ut pen leh l het ut pen chu a hinkhua'uhung kithen dan hi ahi.

3.1. Easter brothers te Unau Pianthak ma:

Easter brother te unau chanchin gen ding hita leng a gen dingte ahem, azik dingte a ding in gen haksa leh zik haksa pen ding chu a neulai chanchin uh hi ahi. Easter brother te unau hi Christian inkuan a pat hung piang himaleu Christian hindan leh Christian chawndan bangma helo ahiu ti leng tikhiallo ding i hiu. Aziak chu Easter brother nu leh Pate'n zia unau dawî umtake hi aneu

apat biak in kikhawm ahem, Sunday school kai ding ahem a pui khalo, hil khalo ahi ziak un zia unau dawi um takte hin kua ahem Jesu? Bang sakhua zui ka hem tile kihelo ahiu. Zia bep chu hilo in khawitak ahem biak in, bang atia biakin kichia sek ahem, Biakin hi bang a kimang ahem? ti nasan le helo hiding in ginchak a um hi. Nu leh Pa nei himaleu le Nu leh Pa etkawlo puihuailo nana chu chavai deu hileu kilawm in a um ui. A ziak chu a unau pathum un zu addict vek ahiu a, amau chung a police register case le bangzat hem bawl ahi.

Easter brother te unau chu a neulai un khawlai vel a lawi pawl thei ahung hi ua kipat lawi phalo tawh hung kipawl in nasatak in zu a hung dawn ua, mivante gu in mizakda tincheng ahung bawl phat un mitamtak mikham leh huat ahung lawh tau. Zia bep chu hilo in a zu dawn nau achu Rusell Easter hi zu aha dawn bekset ziak in apuksia, zia laitak achun anau James Easter chun thei leh theilo in hospital lam ah pui in hospital a ava kawih leh zia kipat chun maktak

mai in damna ahung chang kit a, zia damna chu Easter brother te a dinga a hinkhua'u hung kihei patna hung suak tai.

James Easter ahile vang Car leh thildang guk ziak in kum 17 atin ma jail ah kum 10 tang ding in a um a, jail ah a um sung in Rev. C.S. Grogan hin jail sunga a thugen hin ahinkhua ahung sukhata, zia Rev C.S. Grogan thu gen chu "Jesu'n ahung lungsiat hi, la gitlona chu banggual hiziang malehle Jesu'n ahung lungsiat hi, ama kiang ah hung le chun ala pawm ding ahi" ti ahi, Zia thu a ngaithak ah kipat chu James a dinga a lungthim hung kihei patna ahung suak a. Jail a kumsawm hun mang ding lai a umchan aphot ziak in Jail hotute dawisakna zâl in kum nga a um nung in Jail akipat pawtsak ahitai.

3.2. Easter brother te Unau hinkhua kithenna:

Rusell Easter damlo ahung damdaw phat in nungak melhawi tak Pathian mitak tak Myrtle tawh a hung kidawi ua a hung kicheng tau a, zia phat ah chun a zi dawitak Myrtle chun Rusell Easter a ding

ahin thei tawp sua in biakin lam ahte pui in theitawp in a pauchap piak sek a, zia kipat chun Rusell Easter hi pianthak-na hung chang in ahinkhua hung siampha'n Pathian lam a tita-kzet in ahung nai a, ama ding bep hilo in anau Edward Easter hial le apuihuai in asiam pha ahi. Zia hunlai tak ahin James Easter hi Jail a um ahi ziak in bangma a lawthei pua, James easter Jail a kipat ahung pawt phat in Rusell hin ama in lam a pui in biakin lam ahte apui a, Pathian kiang ah nasatak a pauchapna tawh pang in anau James hile Pathian lam hung nai in ahung kimangtai. Zia a kipat ahin zia unau dawium tak te hin amau Pathian na asejna ding uh Pathian in talent apiak chu hung ladawk in Pathian na lungthim leh titakzet in hung sem pan tau a, khawvel thil a kihei kit talo ding leh Pathiana a ding bepa sem ding in a hinkhua uh ahung pedawk tau ahi.

Easter brothers or the Green Quartet Valley ten Pathian la asak zing lai un a hung minthang mama ziang tau. Zia laitak achun a executive di-

rector pau in sum tampi laklut a ut ziak in, The Easter Brother te kiang ahin Love Song (Zawl la) la sak ua le record chat list ahin la min uh amasa pen a hung kaw piak ing ka tin sum tampi la lut ding la hui tin ava them a, zia laitak achun The Easter Brother ten hin " Kei un khawvel ah zawl lâ thupip-en leh lopi pen ka sak lai tak uh ahi. Zia sang a lopizaw leh thupizaw zawl la (Love song) hi aum thei diam? ti'n ala dawnhu uh ahi.

Easter brother's te hin theitawp sua in Pathian na a sem ua, zia sang a nasazaw sep zel gua ka hui tin agen ua, amau bep hilo in a suan leh pak teu natiang inle pi leh pute sul nungzui in Pathian na nasatak in sem ding in a kichial in aki fui uh ahi.

4. Zil ding:

Easter brother te unau apat hin thil tamtak zil ding a um a, ziate lak a pawimaw diak zildaw dinga pha chu. Nu leh Pate hin i chate'u aneu apat Pathian lam a puihuai hi l mawpuak nau ahi. Nu leh Pa hingal a chate nik leh puan, nek leh chak bep piak hi Nu leh

Pa tamtak chun a hun tawk a i ngai mai thei ahinla, zia tak-sa lam mamawh lam bep hilo in amau thagau leh taksa lam pitinna ding le l ngaitua piak un apawimaw ma ma hi. Nu leh Pate'n la tu leh chateu hinkhua a tangpi in za lak ah sawmnga hi nang mau ziltina akipat pawt leh zui ahui. Ziaziakachun, la tu leh chate phatna ding leh pitinna ding in Pathian thu a puihuai leh zilsak chu nu leh pate mawpuakna ahi.

Easter brother te unau apat a zilding pawimaw ma ma dang khat chu mani lungthim kithunun hi ahi. Adiak in eimi tamtak khamthei suak ala tang leh lampi sual ala chiate'n, ka zo tapuai ka hithei puai iti sek uhi l tuplo ziak uh ahi. Bang gual in sual maleu hin, bang gual in sual lampi ala haw maleu hin le Pathian in i hung kile kitna ding hunpha ei siam piak sek a, ei mihingten chapona leh tuplona ziak in thil hitheilo gual in ila ngai kha sek ahi. Zia chu hilo in ka bawl thei hi, zia thepna hi zo ngei ding ka hi Pathian zal in ti leu hin zo mai ding ihui. Easter brother te unau in a sual dogal uh zo in

zawna la chu asa tau a, nang in bangtik le la sual dogal zo in zawna la sa ding la hem? la vaigei masang in la chiana lampi en inlang hungki le kit in, Lalpan hung la pawm kit ding ahi.

5. Conclusion:

Joshua'n kei leh ka inkuanten vang Lalpa na ahi ka sep ding uh atiu a. Zia gual chun Easter brothers ten le Pathian na bep sem ding in aki kawi chuam tawp mai ua, tuni nang leh la inkuan ten bang na hem la sep ding uh tel hun ahi tai. La insung ah malsawmna la dawn zozaita hi ahi ding him a la gel em? Bible in Pathian het chu pilna bul ahi, zia pilna bep chu hilo in mimal, insung, kochuam leh society a ding in damna leh hiselna ahi ziak in ei uh a ding in Pathian nai khel a thil phazaw aum puai. Pathian nai ah ama bel thak ding in Pathian min in i ki chial ahi.

.....xXx.....

OBITUARY**REV. HAUKHAM****(13/07/1937 - 24/08/2019)**

Belampu suan um leh Khuga Sadar Presbytery a dinga kingakna ting Rev. Haukham of K.Salem in Dt 24/08/2019 ni'n a hepi a insung mite leh kochuamte nusia in a nasep piak Lalpa kiang in ei la chawldam san tak hi kochuamte'n i sun tak zet uh ahi. Lalpan a nusia a insung mite leh kochuamte thamuanna pezelta hen!

A CHANCHIN:

Rev.(L) Haukham hi Theigawtang khu'a'n dt. 13th July 1937 kum in apiang a, Pu(L)Vungkhual Khaute leh Pi(L) Veigo Khongsai kâl ah gil ah ga pakua(9) te laka a pagiatna(8th) ahi. Dt 12th October 1944 kum in Khristian a hung hi'n, baptisma chu dt. 13th October 1955 kum in Rev. Zaithangpuia khut in a chang hi. Dt. 11th January 1960 kum in Pi. Taikhawchawng D/o Pu. (L) Tongkhokam, Chief of Mualkot tawh Rev. Zaithangpuia khut in ala kikhutsui un Pathian ah pat malzawlna cha leh nau giat(8) a nei un, ttu pawsal 11 leh numei 9 a nei u'i.

Thiamzilna lam:

#1951 kum in **Class I** Mualpi LP School in ala zil hi.

#1959 kum in **Class IX**, CCPur in ala zo hi.

#1968 kum in Diploma in Theology, Cherra Theological College in a zo hi.

Mission ah kimatna:

1962-64 sung in Evangelist Teacher na chu Assembly of Presbyterian Church(NEI) chawpna nuai in Mualkot LP School in a sem hi. Zia hunlai ahin Bible zil dingin kidawtna chu Presbytery in a hung nei in, zia a kidawtna chu phal piak ahi dungzui in 1965 kum in Cherra Theological College a join tai. 1968 kum a Diplo-

ma in Theology a hunzo in Dt.15th July 1968 Probationary Pastor dinga siam ahi.

Pro. Pastor a sep sung ahin KSP Secretary in 1969-70 sung apang kit hi. Dt. 11/12/1972 kum in pastor ordination chu Mission Veng, Aizawl. Mizoram Synod nuai in Rev. Lalthanga khut in ala chang hi.

Rev. Haukham hi puitu masa a hi ziakin haksa tamtak thu-ak zing pum a kochuamte kalsuantopi zing mi ahi ziakin Presbytery leh Manipur Synod ahin dinmun pawimaw tamtak ala tu ahi.

KSP ah kimatnate:

1. Moderator 8 vei-(1975, 78, 82, 84, 86, 93, 97 & 2006)
2. KSP Secretary 1 vei-(1969-70)
3. KSP Office Incharge cum Accountant -(1979-80)
4. Gamthak Board phudawktu -(1980)
5. KSP Executive Secy. -(1990-91, 1999-2000)

Rev.(L). Haukham in haksatna tam tak ala thuakto a, zia laka chun Gamthak Board a hung dindaw hun hile ahi. Rev.(L). V.S. Liankhawpau thi nung in KSP sung ah kochuamte chu ngui leh chau tak mai in a um tau ahi. KSP Lawng hektu Rev. (L) V.S. Liankhawpau chu tuisuagiat sunga tum gual ahitai. Zia hun lai ah chun KSP hi dingzo dinga gingchakna hi a tamtalo ahi. Hmaleh, Rev. (L). Haukham hin bial(Dist) sung chu a ve ham ham a, a bialfanna ah pauchap gualna haw zosia chule kâna bep ala hitai. Langkhat lam ah Rev.(L). Haukham chu kochuam dang khenkhatte'n amau kochuam ah pangmai dinga them pawl le a bei diak puai. Ahinla, KSP sung ah mitawmngai khenkhatte chu Rev. (L). Haukham kiang ah chialna ala bawl un, zia gual hin ala gen ui.

“Pu. Liankhawpau in hung sisan ziang le zawng, lungkham ken aw...Kham. na kithuapi ding upa ka um nau hi” (L). Upa Thongzachin).

“Kochuam a ngui taluai, Revival bawl hitiu, bangtik le patdi la ti em? Pi(L) Bualkhoting in ala tikit hi.

Khuga Sadar Presbytery sung ah kochuamte dinmun chu dengdel ma ma ah a umlai ah chun Rev. (L). Haukham chun Pathian kihopina, *“La keng in ding in”* (Eze. 2:1). ti thu chu a hung muta ahi. Tichun, kochuamte ngui tak mai ah a umlai ua kaihail kitna ding in Gamthak Board chu a hung pan tai. Ziaziakachun, Rev.

(L). Haukham hi Khuga Sadar Presbytery kaihingu khat ahi tilo theilo ahi.

Manipur Synod ah dinmun ala tuk khakte:

1. Moderator 4 vei-(1979, 84, 88, 96)
2. Executive Secretary term ni(2 vei) -(1987-89&1994-96).

Rev. (L). Haukham chanchin ah genlatlo theilo khat chu KSP cha hin; Muol Lhang Phai Presbytery (MLP) hi ahi. MLP hi nidang ah chun Thangting Bial kiti ahin, KSP ah um ahiu hi. Kochuam khangto tak mai a hiziak un Presbytery ah siam thei dinga a um tak ziak un KSP dawisakna zalin Presbytery khat hiding in Rev. (L). Haukham in dt. 22nd April 1979 kum in Mata Lambulane in hawna a nei hi. Hun chawmkhat chia hawi ziang maleu pastor leh Upate chu kochuam dang; KCC leh KBC ah a tailut tâk ziak un Manipur Synod chun animated suspension in hun chawmkhat kawi in a enkawl a, hun chawmkhat nung in ding thei kit dinga a um tak ziak un Rev. (L). Haukham ma ma in Dt. 30th November 1996 in hawna a nei kit tai.

VCF ah kimatna:

1. Chairman-1988-2001

Rev. Haukham hi kochuam vaihawmna lam bep hilo in thagau lam in le a kimatchakna gen ding tam tak a um hi.

1. Baptisma a chansak po po zat -2045
2. Nupan a kichensak zat -415
3. Gingthak laklut zat -in 20 (mi 153)
4. Hunkhat ah baptisma a chansak zat -80
5. Hun khat ah nupan a kichensak zat -15

Rev. Haukham hi sakhaw gam ah vaihawmna lam bep hilo in thagau gam le ngainatu khat ala hi. KSP ah dettak mai ah lalgamna a sep hun in thalaw(pay) piakzawlo in tha tamtak ala umsek maleh, a Lo ah Bute zuak in bialfanna a neijel mai sek hi. Pathian panpina ziakinkum 2000 in ala pension tai. Ama ngei in a chanchin a zikna a chun *“miphalo mipha lût, mi ginum, dingdet mi”* ala kiti ahi.

Zia gual ah Lalgam a dinga kipejo tak mai ah a umlai in taksa upat lam a hi tak zia kin nisin in hung hatlo tiat tiat in Lalpa lemguat dungzui in dt. 24th August 2019 ni'n ei beisan ta ahi.

Shillong Kochuam vethakna report chawmkim leh kipak thugenna

~Mr. Ginthiansiam
Secretary, CKKP

A chiata 23th-26th August, 2019 sungin CKKP committee chun CKKP khangthu a dinga amasa pen dingin Shillong kochuam vethakna alanei hi.

CKKP committee chun Shillong kochuam vena nei dinga thupukna alanei tawh kitawn in 23th-26th August, 2019 sungin committee member mi 16^{te} chun Shillong kochuamte tawh taksa leh thagau ah kipawlkhawmna hun ava kimangthei hi. Committee memberte apat in sum leh pai thei dan dan chiat tuakkhawm in abangkhausia CKKP fund mangcha'n ala kizin hi. Date 23rd August, 2019 ni'n Shillong zuan ding in member 16^{te} chu Imphal Airport apat kipan dawk in Guwahati Airport chan Flight ah lengin, zia ah kipat chun mini-bus in Shillong chu akitung hi. Guwahati Airport ah kipat ah Shillong tiang ading in Shillong kochuam in gari (Mini-bus) khat ngaitua in Airport in eila dawn ui. Chuleh, 2013-2015 sunga CKKP Finance Secretary ah ginum tak ah ala pang Nu Lamthenzam leh a pawsal Thomas

Tongpao Haokipte nupan ngei inle CKKP member kalsuan dawktute chu Guwahati ah a In mun un Thingpi eila dawn-pi'u hi. Ama leh a insung mite chung in Pathian min in kipak thu I gen a, Lalpa'n amaupui in malsawmna tamtakin delzui zelta hen. Pathian mapuina zal in Shillong ah Pastor Lienthienmang In chu nitak dak 8 ding vel in ei puitung ua, zia hun ah chun nek leh dawn chu leh giakna-tuna ding kituptak leh feltak in guanggal piak in ka um ui. Date 24th zingkal in Shillong kochuamte pan lakna zal in Tour in ei pui ua, Asia gam-sung pumpi a dinga Khua Thiangtho pen (Cleanest Village), Mawlynnong khawsung fang in zia mun ah chun zingkal an-ne'n hun nuam tak ka vamang ua, zia zaw ah chun Living root Bridge (Thingjung lei) ei etpi kit ui. Tour hunsunga nek leh dawn chu leh lamman (gari bahara) leh sen leh so zosia chu Shill-

ong kochuam in kiphah tak ah a puakdaw uh ahi. Date 25th ni'n Shillong Biakinn ah Pathian thu kipawlna chu sun hun dak 1 ah nei pat ahia, zia kikhawpna chun kochuam mipite leh JRTS Student 11te tawh hun nuamtak matkhawm ahi. Pu P.D. Minlal, Asst. Leader in hun vawp-tu hina la'n, Pu. Lianboi, Asst. Secretary in Record bawl in, Rev. Seilunlal Vaiphei, Leader in kipak thugenna leh Shillong kochuam vethakna thu chawmkim tak ah genna a neizaw in CKKP committee memberte apat leh JRTS ah Bible Studentte apat Pathian Chawihawina lâ ngaithak ahi. Pu. Ginthiansiam, Secretary CKKP in Pathian thu holimna, "Pathian kona" ti thupi mang in hun a mang hi. Kikhawp khawmna hun matzaw ahinung in Kochuamte'n taksa lam ankuang a siam uh chu umkhawm ahi. Pathianni nitak lam dak 4 vel ah pat in memberte hawn insuantin tawna (House visit) chu Tualsung Local Secretary Tv. Khukhup malatna'n zândak 11 ding vel in zaw ahi. Chuleh, date 26th August, 2019 zingkal matak ah Shillong nusia CKKP memberte chu Guwahati ah Assam State zoo cum Botanical

garden ah lut malam in sun dak 2 ding vel in Imphal Airport chu damtak in ka hung tung kit tau.

CKKP memberte zosia hin, Shillong kochuam vethakna a kineina chung ahi'n CKKP min bep titaklo in mimal ah kipakthu gen ding tamtak nei le a ki um hi. Khanglai min ah kalsuantute buailo kei in gari eila hawl piak ua, Guwahati apat eila dawn in, Tour ah ei pui ban ua, nek leh dawn tui taktak ei guanggal piak bak un House visit tianga ei zui vel uh haw hi ka ngaitua un a lopi hi kasa mama ui. House visit hun ah taxi man (taxi hiring charge) natiang le Shillong kochuam in a hung puakdaw piak uh hi kangaitua in a lopi puai ka tilo theilo ahi. Chuleh Elect Upa Kailianlal ngei inle CKKP kithuapina in house visit hun in cheng 5000/- a hung piakna chung in CKKP in zia Damna Aw hi mangcha'n kipak thu ka hun gen ui. Shillong kochuamte zosia chung in CKKP in Pathian min in kipak thu ka hun gen ui.

Lalpa Pathian in zia gual ah mi tawmngai leh kipezote hi taksa leh thagau ah malsawm in jangvuk zelta hen ti'n ka dawisakna sangpen uh ka hun la'n ui.

'DAMNA AW' PHUNGVUKTUTE :

PATRON MEMBERS :

1. Pu P. Vaiphei IAS, Imphal
2. Upa Henthianthang, S.Kotlian
3. T.Upa Haulallawm S.Kotlian
4. Upa Thienkhomang S. Kotlian
5. Upa Laltinkhup, HQ. Church, Tuibuang
6. Pi Manliankim, HQ. Church, Tuibuang
7. Nk. Lalsangpui, S.Kotlian
8. Upa D. Mina, Lingsiphai
9. T.Upa Ph. Gena, Lingsiphai
10. Pu. Khamlal Saipum
11. Pu Khamliankap Saipum
12. Pu. tinlunlal Saipum
- 13, Pu. S.Kapbawi New Delhi
14. Upa Genhau Central Church,Compound veng
15. Pu. Khailianbawi Central Church,Compound veng
16. Pi Kimtawi Kohima

MEMORIAL GIFT :

1. Pi Deem Melody, **Central Church, (Rengkai)**
[in loving memory of (L) Upa Lamthianlal]
2. Pi Rebekah **Kangvai**
[In loving memory of (L) Pastor Khaivung]
3. Upa Liansomthang **Lingsiphai**
[In loving memory of (L) Pu. Henzagen]
4. Pi. Nem Grace Boisi Capvung **Delhi**
[In loving memory of (L) Pi Vanlalchhuangi]

SUPPORTING MEMBERS :

1. Upa Khomlunlal S.Kotlian,
2. Pu. S.Thangminlian Lingsiphai,
3. Pu Lelboi, Lingsiphai
4. T.Upa Lalneilian Central Church,
5. Pu EL Soson Central Church
6. T.Upa Genminthang, Central Church,
7. Pi. Kimneihawi Saipum
8. T.Upa J. Mark Saipum
9. Pu Genthiankap, Nghathal
10. Pu Lianzakhup Nghathal.
11. Pu Lemthang L. Mission Veng

12. Rev. S.T.Kaia Vaiphei Nghathal
 13. Pu. Hausang Shillong

ENCOURAGERS :

- | | |
|------------------------------|--------------------------------|
| 1. Pu P. Kamneilian, | Lingsiphai |
| 2. Evan Thianlam | Lingsiphai |
| 3. Pastor Kaiminlian, | L. Saronphai |
| 4. Upa K.Thanga, | Kangvai |
| 5. T.Upa Manglem, | Kangvai |
| 6. Upa S.Bela Capvung, | Kangvai |
| 7. T.Upa David, | HQ Church, Tuibuang |
| 8. T.Upa Khupneu, | HQ Church, Tuibuang |
| 8. T.Upa Zamthamuan | HQ Church. Tuibuang |
| 10. Pu Lamthianlun, | Central Church, Compound Veng, |
| 11. Pu Vendam, | Central Church, Compound Veng, |
| 12. Pu Haudal, | Nghathal |
| 13. Pu Khamliankhual, | Nghathal |
| 14. Pi Mary Vaiphei, | Nghahal |
| 15. Upa Paukholam | Nghathal |
| 16. Pu Tongzahem | Nghathal |
| 17. Pi. Nunmawi | Ngahthal |
| 18. Pi. Kimbawi | Nghathal |
| 19. Pu Kaikham | Saipum |
| 20. Pu Pauthianlal @ Mengpu, | Saipum |
| 21. Upa Ginneithang, | Saipum |
| 22. Pu Donggen | Saipum |
| 23. T.Upa. Lallawmthang | Saipum |
| 24. Pu.Damthang | Saipum |
| 25. T.Upa Ginlun | Saipum |
| 26. Pu Kaipau | Saipum |
| 27. Pu. Khamthianlun | Saipum |
| 28.Upa. Kaijuanthang | Tangmual |
| 30. Rev. Haulalven | Tangmual |
| 31. Pu Gomang | Tangmual |
| 32. Pu Kamneilal | Tangmual |
| 33. Pu Kaisawmlal | Tangmual |
| 34. Pu Thangneilun | Tangmual |
| 35. Pu. K.Minlian | Tangmual |
| 36. T. Upa K.K. Siam | Tangmual |
| 37. Pu. Khamlallawm | Tangmual |
| 38. Pi. Niangphal | Bisanmual |
| 39. Upa Thangpu Changsan | Leimakhong |

40. Pu. Khamsawngolian	Kohima
41. Upa Nehneithang	Leilon
42. Upa Khupmang	Leilon
43. Pi. Hawiniang	Leilon
44. Upa Tongneilal	Leilon
45. Upa thangmang	L.Champhai
46. Upa Ph. Kamlam	L.Champhai
47. Upa S.T.Siam	L.Mission Veng
48. Pu. Seidam	L.Miaaion Veng
49.Pu. Hentinmang	L.Mssion Veng
50.Pu. Malzawl	L.Mission Veng
51.Pu. L.K.Vaiphei	L.Mission Veng
52.Pu. Lemlian	L.Mission Veng

Damna Aw monthly magazine hi tutiang ahin kochuamte'n phungvukna i bawlte'u ziaka hin chiazel i hiu a, kuale phungvukna bawl utte a ding in bangtik lai in le bawlthei zing ahi.

- (i). Patron member- Kum 3 (three) a ding in ₹. 3,000/-
- (ii). Supporting member- Kum2(two) a ding in ₹. 2,000/-
- (iii). Memorial Gift- Kum 2(two) a ding in ₹. 2,000/-
- (iv). Encourager- Kum 1(one) a ding in ₹. 1,000/-

Chun, sum thawt nuamte a ding in:

A/C name: Khuga Sadar Presbytery(MPCS)

A/C nos: 32483318505

Branch code: 6182, ccpur

CIF

nos: 86412486695

IFSC nos: SBINOO06182.